



## MINORANCIS EUROPEANIS... CUL BALON TAI PÎTS

Che minorancis linguistichis e sport a ledin dacuardi, lu dimostre ad in plen la manifestazion Europeada, vâl a dî il Campionât European di balon des minorancis nazionâls autoctonis. L'event al è realizât de FUEN - Union Federâl des nazionalitâts europeanis -, fondade a Parîs tal 1949 cu la volontât di preservâ e di promovi la identitât, la culture, i dirits e lis carateristichis unichis des minorancis europeanis.

La idee dal Campionât e poie su la constatazion che il sport al cree sedi spazis di confront che di union e condivison, spirt di competizion ma ancje sintiments di solidarietât e di amicizie. Il balon, in particolâr, al è un sport privilegjât no dome par vie de sò presince a nivel mondiâl, ma ancje parcè che - si ben che a nivei alts al cjapi dentri un mont dorât e cuasi artificiâl - tal stes timp nol domande sfuarç par jessi praticât di cualsisedi frut o persone, in cualsisedi paîs o strade dal mont, ancje chê plui puare o isolade.

E duncje cheste idee di un campionât des minorancis e je someade dal moment une buine modalitât par tirâ la atenzion su la ricjece linguistiche e culturâl de Europe. Par chest, tal 2008 al è stât organizât pe prime volte l'event de Europeada, li che a àn partecipât vincj scudris in rapresentance di tredis stâts europeans.

Il campionât - che si davuelç ogni cuatri agns in maniere paralele al Campionât european di balon de UEFA - si zuirà pe cuarte volte tal 2020. Pe prossime edizion la candidature pe ospitalitât e jere stade presentade di dôs realtâts: de regjon a confin tra la Gjermanie e la Danimarce (Sønderjylland-Schleswig) rapresentade des cuatri minorancis che a vivin te aree, cul sproc: *“La Europeada 2020 tra il Mâr dal Nord e il Mâr Baltic - il festival transfrontalîr dal balon”* e dai slovens de Carinzie cul sproc: *“La Europeada 2020 in Carinzie// Koroška - Insiemi unics/Skupno enkratni - insiemi o celebrin la unicitât de nestre diversitât in Europe”*.

Daspò di une competizion entusiasmande tra i candidâts, il vincidôr al è stât sielt tal mêis di Mai passât, te suaze de Assemblee dai delegâts dal FUEN davuelte in Romania. I slovens carinzians a àn convinçût i delegâts cuntune presentazion emozionante e une idee coerente: cent agns daspò dal plebissit in Carinzie, la Europeada e ufrîs ae minorance slovene la oportunitât di inçressi la cussience sui problemis che a esistin ancjemò tal lôr paîs.

Duncje, daspò des edizions precedentis ospitadis dai Rumançs tal Cjanton dai Grisons in Svizare tal 2008, dai Sorbs de Lusazie in Gjermanie tal 2012 e dai todescs e dai ladins dal Sud Tirôl tal 2016, la cuarte edizion e vignarà ospitade dai slovens carinzians in Carinzie/Koroška tal Istât dal 2020!

Il torneu al è viert aes scudris di membrs des minorancis che a zuin in campionâts no professionistics. Dilunc di une setemane, dongje des competizions sportivis, si organizin ancje tantis manifestazions e events culturâi paralêi che a promovin i lûcs e lis singulis minorancis.

Al sarès une vore biel se si rivàs a meti adun une o plui scudris di balon ancje in rapresentance dal nestri teritori che al à trê minorancis storichis (furlane, slovene e gjermanofone), cussì di jessi prons pal 2020 stant ancje che si zuie juste di là dal confin, e magari, ca di cualchi an, ospitâ propit in Friûl chest impuartant incuintri sportîf.

Par informazions:  
 FUEN <https://www.fuen.org>  
<http://www.europeada.eu>